



PEKELILING AKADEMIK BILANGAN 8 TAHUN 2017

POLISI PENGANUGERAHAN GELARAN PROFESOR EMERITUS DI UNIVERSITI TEKNIKAL MALAYSIA MELAKA

Pejabat Pendaftar
25 Ogos 2017

Disalinkan kepada:

Naib Canselor
Timbalan Naib Canselor (Akademik & Antarabangsa)
Timbalan Naib Canselor (Penyelidikan & Inovasi)
Timbalan Naib Canselor (Hal Ehwal Pelajar)
Penolong Naib Canselor (Jaringan Industri & Masyarakat)
Penolong Naib Canselor (Pembangunan & Pengurusan Fasiliti)
Pegawai-Pegawai Kanan

UNIVERSITI TEKNIKAL MALAYSIA MELAKA

UTeM.02.07/100-3/14 (20)

25 OGOS 2017

PEKELILING AKADEMIK BIL.8/2017

POLISI PENGANUGERAHAN GELARAN PROFESOR EMERITUS DI UNIVERSITI TEKNIKAL MALAYSIA MELAKA

1.0 TUJUAN

- 1.1 Pekeliling Akademik ini bertujuan untuk memaklumkan kepada staf dan pelajar Universiti Teknikal Malaysia Melaka (UTeM) mengenai Polisi Penganugerahan gelaran Profesor Emeritus di Universiti Teknikal Malaysia Melaka.

2.0 LATAR BELAKANG

- 2.1 Gelaran Profesor Emeritus diwujudkan sebagai satu bentuk pengiktirafan dan penghargaan kepada seseorang Profesor yang telah bersara daripada perkhidmatan tetap atau tamat tempoh kontrak atau tamat tempoh peminjaman kepada Universiti untuk suatu tempoh yang lama dan telah memberikan perkhidmatan yang cemerlang kepada Universiti. Penganugerahan gelaran akademik ini adalah pengesahan Universiti akan kecemerlangan kesarjanaan, perkhidmatan, sumbangan idea dan tenaga Profesor yang memenuhi kriteria/syarat penganugerahan.
- 2.2 Penganugerahan gelaran akademik ini membolehkan individu tersebut memakai gelaran "Profesor Emeritus" setelah beliau bersara atau tamat kontrak atau tamat tempoh peminjaman di Universiti di samping menikmati kemudahan-kemudahan yang dinyatakan di bawah Polisi Penganugerahan Gelaran Profesor Emeritus di Universiti Teknikal Malaysia Melaka.

- 2.3 Polisi Penganugerahan Gelaran Profesor Emeritus di UTeM adalah seperti di **LAMPIRAN A** dan hendaklah digunakan sebagai dasar dan rujukan bagi penganugerahan gelaran Profesor Emeritus.
- 2.4 Mesyuarat Lembaga Pengarah Universiti Bil.3/2017 pada 6 Julai 2017 atas perakuan Mesyuarat Senat Bil.5/2017 yang bersidang pada 24 Mei 2017 dan Mesyuarat Jawatankuasa Tetap Senat (Hal Ehwal Akademik) Bil.5/2017 yang bersidang pada 15 Mei 2017 telah bersetuju meluluskan Polisi Penganugerahan gelaran Profesor Emeritus di Universiti Teknikal Malaysia Melaka seperti yang dilampirkan.

3.0 TARIKH KUAT KUASA

Pekeliling Akademik ini berkuat kuasa mulai **6 Julai 2017**.

Sekian, terima kasih.

“KOMPETENSI TERAS KEGEMILANGAN”

Saya yang menurut perintah,



DATUK HASAN BIN SIRUN
Pendaftar

NAMA POLISI : Polisi Penganugerahan Gelaran Profesor Emeritus Di
Universiti Teknikal Malaysia Melaka

KELULUSAN : i. JKTS Hal Ehwal Akademik 15 Mei 2017
: ii. Senat 24 Mei 2017
: iii. Lembaga Pengarah Universiti 6 Julai 2017

TARIKH MULA : 6 Julai 2017

BERKUATKUASA

REKOD PINDAAN : Pindaan 1 (jika ada):-

JKTS Hal Ehwal : .. hb ... 20..
Akademik
Senat : .. hb ... 20..
Lembaga Pengarah : .. hb ... 20..
Universiti

PEMILIK POLISI : Timbalan Naib Canselor (Akademik & Antarabangsa)

PELAKSANA : Fakulti

RELEVAN : Bahagian Pengurusan Sumber Manusia, Pejabat Pendaftar.

KEPADA

POLISI PENGANUGERAHAN GELARAN PROFESOR EMERITUS DI UNIVERSITI TEKNIKAL MALAYSIA MELAKA

1.0 TUJUAN

Polisi Penganugerahan Gelaran Profesor Emeritus Di Universiti Teknikal Malaysia Melaka (selepas ini dirujuk sebagai “Polisi”) ini digubal bagi memberi penjelasan mengenai tatacara penganugerahan gelaran Profesor Emeritus di Universiti selaras dengan peruntukan Perlembagaan Universiti Teknikal Malaysia Melaka P.U.(A) 470/2010 dibaca bersama Perlembagaan Universiti Teknikal Malaysia Melaka P.U.(A) 399/2012.

2.0 TAFSIRAN

Dalam Polisi ini, melainkan jika konteksnya menghendaki makna yang lain-

“**bersara**” bermaksud meninggalkan perkhidmatan tetap dibawah Seksyen 10, 11, 12 dan 13 Akta Pencen Pihak Berkuasa Berkanun Dan Tempatan 1980 (Akta 239) yang terpakai kepada staf-staf Universiti;

“**Fakulti**” bermaksud Pusat Tanggungjawab yang diberi tugas oleh Senat bagi menjalankan program akademik dan memperakukan penganugerahan ijazah Sarjana Muda atau Diploma atau Sarjana atau Doktor Falsafah kepada pelajar;

“**staf**” bermaksud mana-mana orang yang diambil kerja oleh Universiti di bawah Perlembagaan dan mana-mana statut Universiti;

“**Syarat Penganugerahan**” bermaksud syarat-syarat seperti yang dinyatakan di Perenggan 5.0 Polisi ini;

“**Perlembagaan**” bermaksud Perlembagaan Universiti Teknikal Malaysia Melaka P.U.(A) 470/2010 dibaca bersama Perlembagaan Universiti Teknikal Malaysia Melaka P.U.(A) 399/2012;

“**Profesor**” bermaksud pegawai dari Kumpulan Gred Khas C hingga Turus 1; dan

“**Universiti**” bermaksud Universiti Teknikal Malaysia Melaka.

3.0 PENGENALAN

- 3.1 Senat Universiti memperakui sesuatu pengiktirafan boleh diberikan kepada seseorang Profesor yang telah bersara daripada perkhidmatan tetap atau tamat tempoh kontrak atau tamat tempoh peminjaman yang telah berkhidmat dengan Universiti untuk suatu tempoh yang lama dan telah memberikan perkhidmatan yang cemerlang kepada Universiti. Penganugerahan gelaran akademik ini adalah pengesahan Universiti akan tahap kecemerlangan keserjanaan, perkhidmatan, sumbangan idea dan tenaga Profesor tersebut kepada Universiti. Penganugerahan ini membolehkan individu tersebut memakai gelaran “Profesor Emeritus” selepas beliau bersara atau tamat tempoh kontrak atau tamat tempoh peminjaman di Universiti.
- 3.2 Di atas sokongan Fakulti dan dengan perakuan Jawatankuasa Tetap Senat Perancangan Akademik, Senat Universiti boleh mengiktiraf kecemerlangan keserjanaan, perkhidmatan yang cemerlang dan lama serta sumbangan seseorang Profesor yang telah bersara atau tamat tempoh kontrak atau tamat tempoh peminjaman dengan Universiti dengan menganugerahkan gelaran “Profesor Emeritus”. Profesor yang dianugerahkan gelaran sedemikian adalah layak memakai gelaran Profesor Emeritus sepanjang hayat dan beliau layak menerima apa-apa kemudahan yang dinyatakan di bawah polisi ini dan apa-apa pindaannya dari masa ke semasa, tertakluk kepada Perlembagaan.

4.0 OBJEKTIF

- 4.1 Gelaran akademik Profesor Emeritus diwujudkan sebagai satu bentuk ganjaran dan penghargaan kepada Profesor yang telah memberikan sumbangan dan berkhidmat dengan cemerlang dengan Universiti.

- 4.2 Penganugerahan gelaran akademik membolehkan individu tersebut dapat terus berdamping dengan Universiti, selanjutnya meneruskan sumbangan beliau terhadap kemajuan dan penyebaran ilmu pengetahuan khususnya di bawah Universiti.

5.0 SYARAT-SYARAT PENGANUGERAHAN GELARAN PROFESOR EMERITUS

- 5.1 Syarat-syarat calon bagi penganugerahan gelaran Profesor Emeritus adalah seperti berikut:-

- a. Bersara daripada perkhidmatan tetap;
- b. Tamat tempoh perkhidmatan kontrak; atau
- c. Tamat tempoh peminjaman daripada organisasi luar sama ada swasta atau kerajaan/ badan berkanun/ agensi kerajaan kepada Universiti;
dan
Telah berkhidmat sepenuh masa dengan Universiti pada jawatan Profesor selama tempoh tidak kurang daripada tujuh (7) tahun secara berterusan (iaitu tidak terputus disebabkan Cuti Tanpa Gaji). Namun begitu, apa-apa tempoh ini merupakan tempoh minimum Profesor tersebut berkhidmat sepenuh masa di Universiti. Oleh itu, apa-apa tempoh peminjaman Profesor daripada Universiti kepada mana-mana organisasi luar daripada Universiti sama ada swasta atau kerajaan/ badan berkanun/ agensi kerajaan tidak boleh diambil kira.
- d. Calon telah membuktikan kecemerlangan kesarjanaan dalam bidang pengajaran, penyelidikan, penerbitan, perundingan dan pentadbiran.
- e. Calon tidak pernah disabitkan kesalahan di bawah mana-mana undang-undang jenayah atau dikenakan tindakan tatatertib oleh Universiti atau badan profesional.
- f. Calon telah memberikan syarahan umum pelantikan Profesor di Universiti.

6.0 PEMBATALAN PENGANUGERAHAN GELARAN PROFESOR EMERITUS

6.1 Senat Universiti berhak untuk menarik balik atau membatalkan penganugerahan gelaran Profesor Emeritus di dalam keadaan-keadaan berikut:-

- a. Telah disabitkan kesalahan jenayah yang serius;
- b. Apa-apa perbuatan atau peninggalan oleh Profesor Emeritus yang menyebabkan kerosakan atau kerugian kepada Universiti; atau
- c. Imej/reputasi Universiti boleh tercemar disebabkan hubungan yang berterusan dengan Profesor Emeritus tersebut.

7.0 PENGGANTUNGAN PENGANUGERAHAN GELARAN PROFESOR EMERITUS

7.1 Penganugerahan gelaran Profesor Emeritus akan digantung oleh Senat Universiti sekiranya beliau kembali berkhidmat dengan Universiti dan dibayar gaji atau upah tetap seperti pelantikan secara kontrak dan berterusan sehingga tamat tempoh perkhidmatan kontrak dengan Universiti.

7.2 Sepanjang tempoh Profesor Emeritus kembali berkhidmat dengan Universiti dan dibayar gaji atau upah tetap tersebut, beliau hendaklah berhenti daripada menggunakan gelaran Profesor Emeritus dan terhenti daripada menikmati kemudahan yang disediakan bagi seseorang Profesor Emeritus.

8.0 TUGAS DAN TANGGUNGJAWAB PROFESOR EMERITUS

Tugas dan tanggungjawab Profesor Emeritus adalah seperti berikut:-

8.1 Gelaran Profesor Emeritus dianugerahkan kepada seseorang Profesor yang memenuhi kriteria penganugerahan selaras dengan Seksyen 4(1)(k)

Perlembagaan yang bertujuan untuk ***kemajuan dan penyebaran ilmu pengetahuan***. Penganugerahan gelaran ini membolehkan beliau dapat terus bernaung di bawah Universiti dimana kepakaran dan khidmat beliau masih boleh terus disalurkan kepada Universiti. Profesor Emeritus tidak lagi tertakluk kepada apa-apa arahan tugas seperti mana lazim bagi seseorang yang masih berkhidmat namun beliau masih boleh memberikan sumbangan di dalam hal-hal seperti di bawah tertakluk kepada sokongan Dekan Fakulti dan diluluskan oleh Timbalan Naib Canselor (Akademik & Antarabangsa):-

- a. terlibat dengan penyeliaan pelajar pasca siswazah selaku Penyelia;
- b. memohon geran penyelidikan;
- c. memberikan syarahan kepada pelajar-pelajar Universiti berhubung bidang kepakarannya;
- d. menghadiri dan memberi pandangan di dalam Majlis Akademik Fakulti (MAF) tetapi tidak boleh mengundi;
- e. menghadiri Majlis Konvokesyen Universiti; dan
- f. lain-lain keterlibatan yang difikirkan sesuai dan wajar oleh Dekan Fakulti.

8.2 Apabila beliau diizinkan untuk terlibat dengan Universiti di dalam mana-mana aktiviti di atas beliau tidak boleh dianggap sebagai staf Universiti. Tiada apa-apa upah atau gaji tetap yang boleh dibayar oleh Universiti di bawah Polisi ini. Namun begitu, seseorang Profesor Emeritus boleh dibayar apa-apa elaun dibawah skim / polisi yang berkaitan dengan aktiviti yang beliau telah diberikan keizinan oleh Dekan Fakulti dan Timbalan Naib Canselor (Akademik & Antarabangsa) untuk terlibat.

8.3 Tidak boleh pada bila-bila masa mendedahkan kepada mana-mana pihak sebarang maklumat sulit yang dimaklumkan atau diperolehi olehnya atau menyebabkan sesuatu maklumat sulit terdedah kepada mana-mana pihak lain.

- 8.4 Hendaklah sentiasa mematuhi segala undang-undang yang berkuat kuasa dan apa-apa arahan lain dari semasa ke semasa.

9.0 PENGGUNAAN GELARAN PROFESOR EMERITUS DAN KEMUDAHAN YANG DIBERIKAN KEPADA PENERIMA

- 9.1 Profesor Emeritus layak menggunakan perkataan dan gelaran “Profesor Emeritus” di hadapan nama beliau walaupun telah bersara atau tamat tempoh kontrak atau tamat tempoh peminjaman daripada perkhidmatan Universiti dan nama beliau bersama-sama gelaran tersebut layak disenaraikan di dalam direktori atau apa-apa penerbitan Fakulti/Universiti. Nama penuh beliau beserta gelaran “Profesor Emeritus” juga hendaklah digunakan di dalam semua bentuk perhubungan termasuk apa-apa dokumentasi/komunikasi lisan dan panggilan hormat.
- 9.2 Seseorang Profesor Emeritus hendaklah dianggap sebagai seorang Profesor Universiti sebagai penghormatan tetapi tidak dianggap sebagai staf Universiti atau individu yang berada dibawah penggajian Universiti. Penganugerahan gelaran “Profesor Emeritus” tidak memberikan apa-apa ganjaran kewangan atau kemudahan yang lazim diberikan kepada staf.
- 9.3 Penganugerahan ini juga tidak memberikan seseorang Profesor Emeritus hak menjadi ahli sesuatu Pihak Berkuasa Universiti atau apa-apa badan/jawatankuasa lain di Universiti atau memberikannya kuasa bagi menjalankan apa-apa fungsi eksekutif atau pentadbiran.
- 9.4 Di dalam apa-apa upacara istiadat, Profesor Emeritus hendaklah diberi keutamaan sebelum Profesor. Bagi Majlis Konvokesyen Universiti, seseorang Profesor Emeritus diberi penghormatan dan kekananan seperti seorang ahli Senat Universiti.

- 9.5 Profesor Emeritus boleh memohon kemudahan pengangkutan Universiti (kenderaan gunasama) dengan sokongan Fakulti jika keterlibatan beliau di dalam aktiviti Fakulti memerlukan penggunaan kenderaan daripada kampus Universiti ke sesuatu destinasi.
- 9.6 Profesor Emeritus boleh diberikan keistimewaan menjadi ahli kehormat Perpustakaan Universiti.
- 9.7 Profesor Emeritus layak menerima dan menggunakan kad identiti staf sebagai tanda pengenalan dan keselamatan.
- 9.8 Profesor Emeritus layak menggunakan kad nama (*business card*);
- 9.9 Satu bilik kerja khas beserta kemudahan talian telefon tetap, komputer peribadi dan kemudahan internet (serta emel Universiti) boleh disediakan kepada seseorang Profesor Emeritus yang terletak di dalam kampus Universiti dan mengikut had kelayakan seseorang Profesor.

10.0 PROSEDUR

- 10.1 Penganugerahan gelaran Profesor Emeritus tidak berlaku secara automatik apabila seseorang Profesor bersara atau tamat tempoh kontrak atau tamat tempoh peminjaman daripada perkhidmatan Universiti memandangkan ianya adalah suatu kurniaan gelaran akademik yang bergantung kepada kecemerlangan keserjanaan, perkhidmatan serta sumbangan seseorang Profesor kepada Universiti.
- 10.2 Tidak lewat daripada enam (6) bulan sebelum seseorang Profesor bersara atau tamat tempoh kontrak atau tamat tempoh peminjaman daripada perkhidmatan Universiti, Fakulti hendaklah menimbang dan jika difikirkan sesuai, memajukan kertas kerja cadangan penganugerahan

gelaran “Profesor Emeritus” bagi mana-mana Profesor di Fakulti yang berkenaan.

- 10.3 Fakulti hendaklah mengemukakan kertas kerja permohonan yang lengkap kepada Mesyuarat Jawatankuasa Tetap Senat Perancangan Akademik untuk perakuan.
- 10.4 Jika diperakukan, Fakulti membentangkan kertas kerja permohonan kepada Senat Universiti untuk kelulusan penganugerahan.
- 10.5 Walau apapun yang dinyatakan diatas, Senat Uiversiti berhak mengemukakan dan menimbangkan kelulusan penganugerahan kepada mana-mana Profesor dan tertakluk kepada Syarat Penganugerahan.

11.0 PENGANUGERAHAN

Penganugerahan gelaran “Profesor Emeritus” dilakukan di dalam Majlis Konvokesyen Universiti.

12.0 PIHAK YANG BERTANGGUNGJAWAB

12.1 Timbalan Naib Canselor (Akademik & Antarabangsa)

Timbalan Naib Canselor (Akademik & Antarabangsa) merupakan pemilik kepada Polisi ini. Pemilik Polisi bertanggungjawab terhadap pematuhan dan pemakaian Polisi di peringkat Fakulti.

12.2 Fakulti

Setiap Fakulti hendaklah mematuhi polisi yang telah diluluskan.

12.3 Bahagian Pengurusan Sumber Manusia, Pejabat Pendaftar

Bahagian ini bertanggungjawab membuat semakan dan mengesahkan tempoh perkhidmatan untuk kelayakan penganugerahan dan lain-lain perkara yang berkaitan dengan tugas dan tanggungjawab serta kemudahan-kemudahan yang disediakan.

13.0 LAIN-LAIN

13.1 Polisi ini adalah tertakluk kepada undang-undang, pekeliling, surat pekeliling, kaedah dan peraturan yang berkuat kuasa.

13.2 Polisi ini adalah tertakluk kepada pindaan oleh pihak Universiti dari semasa ke semasa.

14.0 TARIKH KUAT KUASA

Tarikh kuat kuasa Polisi Penganugerahan Gelaran Profesor Emeritus Di Universiti Teknikal Malaysia Melaka adalah dari tarikh Polisi ini diluluskan oleh Mesyuarat Lembaga Pengarah Universiti (LPU).